



Fidoyilik —
Vatanga xizmat demak!

2023-yil 14-sentabr, payshanba,
109 (23.830)-son

**KUN
HIKMATI**

Asabni
jilovlay bilish
eng go'zal
fazilat

1913-yil aprel oyidan chiqa boshlagan



www.zarnews.uz



https://www.facebook.com/zarnews.uz



@zarnews_uz



https://twitter.com/zarnews_uz

O'zbekiston Respublikasi Prezidentining QARORI

“O‘ZBEKISTON – 2030” STRATEGIYASINI 2023-YILDA SIFATLI VA O‘Z VAQTIDA AMALGA OSHIRISH CHORA-TADBIRLARI TO‘G‘RISIDA

O'zbekiston Respublikasi Prezidentining 2023-yil 11-sentabr-dagi “O'zbekiston – 2030” strategiyasi to'g'risida”gi PF-158-son farmoniga muvofiq, shuningdek, “O'zbekiston – 2030” strategiyasining “Insonga e'tibor va sifatli ta'lim yili”da sifatli va o'z vaqtida amalga oshirilishini ta'minlash maqsadida:

1. “O'zbekiston – 2030” strategiyasida quyidagi ustuvor yo'nalishlar belgilanganligi ma'lumot uchun qabul qilinsin:

har bir insonga o'z salohiyatini ro'yobga chiqarish uchun munosib sharoitlar yaratish;

barqaror iqtisodiy o'sish orqali aholi farovonligini ta'minlash;
suv resurslarini tejash va atrof-muhitni muhofaza qilish;
qonun ustuvorligini ta'minlash, xalq xizmatidagi davlat boshqaruvini tashkil etish;

“xavfsiz va tinchliksevar davlat” tamoyiliga asoslangan siyosatni izchil davom ettirish.

2. “O'zbekiston – 2030” strategiyasining har bir insonga o'z salohiyatini ro'yobga chiqarish uchun munosib sharoitlar yaratish yo'nalishi doirasida:

a) 2024-yil 1-yanvardan boshlab: davlat maktabgacha ta'lim tashkilotlari tarbiyalanuvchilariga oqsil, vitamin va minerallar bilan boyitilgan sut, yod bilan to'yintirilgan non mahsulotlari berilishi yo'lga qo'yilsin;

Xorazm viloyatining Qo'shko'pir va Xonqa tumanlarida eksperiment tariqasida, barcha boshlang'ich sinf o'quvchilari ta'lim planshetlari bilan ta'minlansin, kelgusida mazkur tajriba respublikaning barcha hududlarida bosqichma-bosqich joriy etilsin;

banklarning nodavlat umumiy o'rta ta'lim tashkilotlari faoliyatini yo'lga qo'yish uchun milliy valyutada ajratiladigan, qiymati 20 milliard so'mgacha bo'lgan kreditlar bo'yicha, foiz stavkasining Markaziy bank asosiy stavkasidan oshadigan, lekin uning 1,5 baravaridan ko'p bo'lmagan qismini qoplash uchun Davlat budjeti hisobidan kompensatsiya taqdim etish amaliyoti yo'lga qo'yilsin;

b) 2023/2024-o'quv yilidan boshlab umumiy o'rta ta'lim muassasalarining kasb-hunar egasi bo'lish istagidagi 10-sinf o'quvchilari uchun tegishli hududlarda talab yuqori bo'lgan kasb-hunarlar-ga o'rgatish kurslari joriy etilsin.

Bunda, dastlabki bosqichda ushbu tartib zarur kadrlar salohiyati va moddiy-texnika bazasiga ega bo'lgan hamda Maktabgacha va maktab ta'limi vazirligi tomonidan belgilangan umumiy o'rta ta'lim muassasalarida joriy etilsin;

v) 2023/2024-o'quv yilidan boshlab Prezident maktablari va ixtisoslashtirilgan maktablar umumiy o'rta ta'lim muassasalarida uchun “tayanch maktab” etib belgilansin.

Bunda, umumiy o'rta ta'lim muassasalarida o'qituvchilari “tayanch maktablar” tomonidan yangi ta'lim dasturlari, dars o'tishning ilg'or metodikalari va o'quvchi bilimni baholashning zamonaviy usullariga o'rgatiladi.

3. Belgilansinki, 2024-yil 1-yanvardan boshlab: onkogematologik kasalliklarga chalingan bolalar uchun Bolalar gematologiyasi, onkologiyasi va klinik immunologiyasi markazi hamda Bolalar milliy tibbiyot markazida gemotopetik suyak ko'migi o'zak hujayralari transplantatsiyasi amaliyoti joriy etiladi;

virusli gepatitning “S” turi bilan kasallangan bemorlarni hamda gemotopetik suyak ko'migi o'zak hujayralari transplantatsiyasi muolajasiga muhtoj onkologik kasalliklarga chalingan bolalarni to'liq Davlat budjeti mablag'lari hisobidan davolash yo'lga qo'yiladi.

4. Shunday tartib o'rnatilsinki, unga muvofiq:

a) 2023-yil 1-oktabrdan boshlab og'ir hayotiy vaziyatga tushgan yoki tushish xavfi yuqori bo'lgan har bir oila bo'yicha alohida “ijtimoiy xizmat ishi”ni yuritish tartibi amaliyotga joriy etiladi. Bunda, ushbu oilalarda sharoitni yaxshilash, ularga davolash, dori vositalari bilan ta'minlash, farzandlarini maktabgacha va maktab ta'limi tashkilotlariga joylashtirish, moddiy yordam berish kabi ijtimoiy xizmatlar ko'rsatish nazarda tutiladi;

b) 2024-yil 1-yanvardan boshlab: Toshkent shahrining tibbiyot muassasalarida davlat tomonidan kafolatlangan bepul tibbiy xizmatlar hajmi va dori vositalari ro'yxatini amaliyotga kiritishni nazarda tutuvchi davlat tibbiy sug'urtasi mexanizmlari bosqichma-bosqich joriy etiladi;

(Davomi 2-sahifada) >>>

Mahalla va qishloqlarimizni obod va farovon maskanga aylantirishda “Tashabbusli budget”ning roli oshmoqda. Mazkur platforma tufayli aholining ishtiroki bilan muammolarga yechim topilyapti.

Ayni paytda davom etayotgan “Tashabbusli budget” jarayonining ikkinchi mavsumi uchun “Fuqarolar tashabbusi” jamg'armasiga 134,4 milliard so'm ajratilgan. Buning 103,7 milliard so'mi davlat, 30,7 milliard so'mi mahalliy budget mablag'laridan shakllantirildi.

- Joriy yilning 17-iyulidan boshlab 7-avgustgacha viloyat bo'yicha tashabbuskorlar tomonidan 3200 ta taklif kelib tushdi, - deydi viloyat iqtisodiyot va moliya bosh boshqarmasi bosh mutaxassisi Shahzod Tursuntoshev. - Takliflar 20 kun mobaynida nizom talablariga asosan saralab olindi. Undan so'ng ishchi komissiya tomonidan 3200 ta taklifdan 2558 tasi ovoz berish jarayoniga o'tkazildi. Ularning 1088 tasi ichki yo'llarni ta'mirlash, 441 tasi maktab, 126 tasi maktabgacha ta'lim, 98 tasi sog'liqni saqlash, 245 tasi ko'cha chiroqlari va elektr ta'minoti hamda 560 tasi boshqa yo'nalishlarga to'g'ri keladi.

Jomboy tumanida fuqarolar tomonidan 120 ta taklif berilgan bo'lib, uning 88 tasi tasdiqlanib, ovoz berish jarayoniga qo'yildi. 25 ta umumta'lim maktabi, 5 ta maktabgacha ta'lim tashkiloti, 4 ta sog'liqni saqlash muassasalarini ta'mirlash, 2 ta ichimlik suvi tarmoqlari, 10 ta ko'cha chiroqlari va transformatorlar o'rnatish kabi muammolarni hal qilish uchun 5,5 milliard so'm mablag' so'ralmoqda.

“Tashabbusli budget”

ko'p yillik muammolarga yechim bo'lyapti



OpenBudget
O'zbekiston Respublikasi
“Ochiq Budget” Portali

- Mazkur jarayon tufayli aholining 70-80 yillik orzulari amalga oshmoqda, - deydi tuman iqtisodiyot va moliya bo'limi bosh mutaxassisi Sardor Pardayev. - Yillar davomida hal bo'lmagan muammolari birgina ovoz berish orqali hal bo'lishini bilgan holda hamjihatlikda ish olib borishmoqda. Mahalla raislari faol fuqarolar bilan o'zaro hamkorlikda aholi o'rtasida tushuntirish ishlari olib borayotganligi sababli ham aholi juda faol ishtirok etyapti.

Joriy yilning aprel oyida birinchi mavsumda ilgari surilgan 2986 ta taklifning 2164 tasi hududiy ishchi komissiyalar tomonidan ovoz berish jarayoniga o'tkazilgan bo'lib, jarayonda viloyatda istiqomat qiluvchi 1595182 nafar aholi ishtirok etdi. Yakunda esa 155 ta taklif g'olib deb topilib, ularni amalga oshirish uchun 135,9 milliard so'm mablag' yo'naltirildi.

Prezidentimizning 2023-yil 10-aprelda-

gi 117-sonli qaroriga asosan, fuqarolar tomonidan 2000 dan ortiq ovoz berilgan takliflarni qo'llab-quvvatlash maqsadida qo'shimcha ravishda 135 ta taklif g'olib deb topilib, ular uchun 137,7 milliard so'm mablag' ajratilgandi.

Nurobod tumanidagi Tim qishlog'i aholisi ham o'z muammolarini hal qilish maqsadida “Tashabbusli budget”da ishtirok etib, viloyatda eng ko'p - 15115 ta ovoz yig'ib, g'olib bo'lgach, 3,5 kilometr yo'l asfalt qilindi. Shuningdek, Arabota va Bunyodkor mahallalari o'rtasida 4 kilometr yo'l ham 1 milliard 150 million so'm sarflanib, to'liq asfalt qilindi.

Birinchi mavsumda g'olib bo'lgan loyihalarning qariyb 40 foizi to'liq bajarib bo'lindi. Ikkinchi mavsumda saralab olingan takliflar uchun ovoz berish jarayoni shu yil 17-sentabrgacha davom etadi.

Dilmurod TO'XTAYEV.

NARPAY VA KATTAQO'RG'ON TUMANLARIGA HOKIMLAR TAYINLANDI



12-sentabr kuni xalq deputatlari Narpay va Kattaqo'rg'on tumanlari Kengashlarining navbatdan tashqari sessiyalari o'tkazildi.

Ikkala sessiyada ham tashkiliy masala ko'rildi.

Sherzod Rahmonov Narpay tumani hokimi vazifasiga, **Jamshid Nasriddinov esa Kattaqo'rg'on tumani hokimi** vazifasiga tasdiqlandi.

Tayinlovga qadar ikkala tuman rahbari ham hokim vazifasini bajaruvchi sifatida ishlab kelayotgan edi.

Sessiyalar ishida viloyat hokimi Erkinjon Turdimov ishtirok etib, hududlarni ijtimoiy-iqtisodiy rivojlantirish, aholi turmush darajasini oshirishda hokimlar va faollar oldida turgan vazifalarga e'tibor qaratdi.



O'zbekistonda bioiqtisodiyot sohasi bo'yicha mutaxassislar tayyorlanyapti

Samarqand agroinnovatsiyalar va tadqiqotlar institutida O'zbekistonda bioiqtisodiyotni rivojlantirish borasida xalqaro o'quv seminari bo'lib o'tdi.

Tadbirda Latviya, Litva, Finlandiya davlatlaridan, shuningdek, bioiqtisodiyot sohasidagi o'zbekistonlik olimlar, ekspertlar qatnashdi. Unda mamlakatimizda bioiqtisodiyotni rivojlantirish imkoniyatlari, uning mohiyati, o'rni, tarmoq yondashuvidan farqlari, yagona bioiqtisodiy ekotizimda

turli subyektlarning vazifalari va afzalliklari haqida so'z yuritildi.

- Loyiha doirasida 3 yildan beri o'zbekistonlik olimlar bilan hamkorlikda ishlayapmiz, - deydi xalqaro loyiha koordinatori, Latviya hayot fanlari va texnologiyalar universiteti olimasi Irina Kultane. - O'zbekistondagi to'rtta oliy ta'lim muassasasi bilan kelishuvga erishganmiz. Bugun ushbu oliy ta'lim muassasalarida loyiha doirasida bioiqtisodiyot yo'nalishida 23 nafar magistr ta'lim olyapti. Kelgusi yilda ular O'zbekistonda bioiqtisodiyot sohasi bo'yicha birin-

chi qaldirg'ochlar sifatida o'qishni bitiradi. Loyiha doirasida kelishuvga erishilgan institutlarda bioiqtisodiyot yo'nalishida mutaxassislar tayyorlash davom etishi va rivojlanishi kerak. Shu maqsadda Samarqand agroinnovatsiyalar va tadqiqotlar institutida bioiqtisodiyot markazi tashkil etildi. Biz o'zbekistonlik oliy ta'lim muassasalarida o'qituvchilarini ham bioiqtisodiyot bo'yicha ta'lim berishga tayyorlashimiz kerak. Ular seminarlarda qatnashib, yevropalik olimlar bilan tajriba almashyapti. Bizning universitetimizda bioiqtisodiyot sohasida uzluksiz ilmiy ishlar, tajribalar olib boriladi. Latviya qishloq xo'jaligi vazirligi buyurtmasi asosida istiqbolli loyihalar amalga oshiriladi va hayotga tatbiq etiladi. O'zbekistonda ham yaqin kelajakda bioiqtisodiyot sohasi bo'yicha istiqbolli loyihalar amalga oshiriladi.

O'zbekiston tarmoq iqtisodiyotidan bioiqtisodiyotga samarali o'tishni amalga oshirish uchun ulkan salohiyatga ega. Ammo bu maqsadlarga erishish uchun mamlakatda bioiqtisodiy yondashuvlarni sanoat amaliyotiga joriy etadigan yuqori malakali mutaxassislar muhtoj.

Seminar Latviya Hayot fanlari va texnologiyalar universiteti rahbarligidagi Yevropa Ittifoqining “ERASMUS+” dasturi tomonidan moliyalashtiriladigan “BioEsUz” konsorsiumi tomonidan tashkil etildi. Unda yevropalik olimlar o'z bilim va tajribalari bilan o'rtog'lashdi.

Xurshida ERNAZAROVA.



Bugun Toshkentdagi Milliy matbuot markazida "Zarafshon" va "Самаркандский вестник" gazetalarining 110 va 105 yilligi munosabati bilan ma'rifiy tadbirlar, tahririyat tomonidan chop etilgan kitoblar taqdimoti hamda shaxmat musobaqasi o'tkaziladi.



O'zbekiston Respublikasi Prezidentining QARORI

“O‘ZBEKISTON – 2030” STRATEGIYASINI 2023-YILDA SIFATLI VA O‘Z VAQTIDA AMALGA OSHIRISH CHORA-TADBIRLARI TO‘G‘RISIDA

(Davomi. Boshlanishi 1-sahifada).

nogironligi bo'lgan shaxslarni **protez-ortopediya buyumlari, reabilitatsiya hamda dori vositalari bilan ta'minlash** ishlari “vaucher” tizimi asosida bosqichma-bosqich tashkil etiladi. Bunda, nogironligi bo'lgan shaxslarga **tovar va xizmatlarni o'zlarini tanlagan yetkazib beruvchidan xarid qilish** imkoniyati yaratiladi va ularning xarajatlari **Davlat budjeti mablag'lari** hisobidan qoplab beriladi.

5. Xotin-qizlarning **ijtimoiy faolligini** oshirish, ularga **o'z salohiyatini to'laqonli ro'yobga chiqarishi** uchun qo'shimcha shart-sharoitlarni yaratish maqsadida **2024-yil 1-yanvardan boshlab** og'ir ijtimoiy ahvolda tushib qolgan xotin-qizlarni **qayta kasbga tayyorlash xarajatlari** davlat tomonidan qoplab berish tartibi joriy etilsin.

6. “O'zbekiston – 2030” strategiyasining **har bir insonga o'z salohiyatini ro'yobga chiqarish uchun munosib sharoitlar yaratish** yo'nalishi bo'yicha:

2023-yilga mo'ljallangan amaliy tadbirlar rejasini 1-ilovaga muvofiq;

2023-2024-yillarga mo'ljallangan maqsadli ko'rsatkichlar 1a-ilovaga muvofiq;

2023-yilda ishlab chiqiladigan normativ-huquqiy hujjatlar loyihalari ro'yxati 1b-ilovaga muvofiq tasdiqlansin.

7. “O'zbekiston – 2030” strategiyasining **barqaror iqtisodiy o'sish orqali aholi farovonligini ta'minlash** yo'nalishi doirasida:

a) **2023-yil 1-oktabrdan boshlab** tadbirkorlik subyektlariga miqdori **10 million so'm** dan yuqori bo'lgan soliqqa oid huquqbuzarliklar uchun, agar tadbirkorlik subyekti huquqbuzarlikni inkor etsa, **moliyaviy sanksiyalarni faqatgina sud tartibida qo'llash** amaliyoti yo'lga qo'yilsin;

b) **2024-yil 1-yanvardan boshlab**: qishloq xo'jaligi mahsulotlarini yetishtiruvchilarga hosilni sug'urtalashda **sug'urta mukofotining 50 foizi miqdorida subsidiya berish** tartibi joriy etilsin;

“Izlanish va rivojlanish” (R&D) markazlari uchun ular tashkil etilgan kundan boshlab **3 yil muddatga** mol-mulk solig'i va yer solig'i bo'yicha hisoblangan summa miqdorining **1 foizini** to'lash, ularning xodimlari uchun ijtimoiy soliq stavkasini **1 foiz** miqdorida hisoblash tartibi joriy etilsin;

davlat ulushi **50 foizdan** yuqori bo'lgan tashkilotlar tomonidan har yili amalga oshiriladigan investitsiya loyihalari qiymatining kamida **5 foizini obligatsiyalar chiqarish orqali moliyalashtirish** tartibi joriy etilsin.

8. **2024-yil 1-yanvardan boshlab** jismoniy va yuridik shaxslarga qo'shilgan qiymat solig'ini **to'liq qaytarib berish tizimi** quyidagilar hisobidan kengaytirilsin:

Xorijiy turistlariga – O'zbekiston xalqaro aeroportlarida O'zbekiston hududida sotib olingan va “Tax free” tizimi bo'yicha rasmiylashtirilgan mahsulotlar uchun;

tur-operatorlarga – xorijiy kontragentlar bilan shartnomalar doirasida ko'rsatilgan eksport xizmatlari uchun.

9. Iqtisodiyot va moliya vazirligining **quyidagilarni nazarda tutuvchi takliflari** ma'qullansin:

O'zbekistonda davlat-xususiy sheriklik loyihalarini ishlab chiqish jamg'armasini tashkil etish va uning asosiy vazifalari sifatida **energetika, kommunal xo'jalik, transport, ekologiya, sog'liqni saqlash, ta'lim va boshqa ustuvor sohalarda** dav-

lat-xususiy sheriklik loyihalari hujjatlarini **sifatli ishlab chiqishni** belgilash;

davlat-xususiy sheriklik loyihalaridan kelib chiquvchi davlatning to'g'ridan-to'g'ri va shartli majburiyatlarini **monitoring qilish, boshqarish va tartibga solish tizimini** amaliyotga tatbiq etish;

Davlat budjeti loyihasini shakllantirish va ijrosi bo'yicha hisobotlarda **budjet xarajatlarining barqaror rivojlanish milliy maqsadlariga muvofiqligi va iqlim o'zgarishiga ta'sirini ko'rsatib borish** (markirovkalash) mexanizmlarini joriy etish.

Iqtisodiyot va moliya vazirligi (J.Qo'chqorov):

a) **ikki hafta** muddatda: xalqaro moliya institutlarini jalb qilgan holda **O'zbekistonda davlat-xususiy sheriklik loyihalarini ishlab chiqish jamg'armasi faoliyatini samarali tashkil etish** bo'yicha O'zbekiston Respublikasi Prezidenti qarori loyihasi;

davlat-xususiy sheriklik loyihalaridan yuzaga kelishi mumkin bo'lgan **davlatning majburiyatlarini boshqarish va tartibga solish mexanizmlarini** belgilovchi Hukumat qarori loyihasi;

b) **2024-yil 1-yanvargacha** Davlat budjeti xarajatlarining barqaror rivojlanish **milliy maqsadlariga muvofiqligi va iqlim o'zgarishiga ta'sirini ko'rsatib borish** (markirovkalash) mexanizmlarini joriy etish bo'yicha Hukumat qarori loyihasi kiritilishini ta'minlasin.

10. “O'zbekiston – 2030” strategiyasining **barqaror iqtisodiy o'sish orqali aholi farovonligini ta'minlash** yo'nalishi bo'yicha:

2023-yilga mo'ljallangan amaliy tadbirlar rejasini 2-ilovaga muvofiq;

2023-2024-yillarga mo'ljallangan maqsadli ko'rsatkichlar 2a-ilovaga muvofiq;

2023-yilda ishlab chiqiladigan normativ-huquqiy hujjatlar loyihalari ro'yxati 2b-ilovaga muvofiq tasdiqlansin.

11. “O'zbekiston – 2030” strategiyasining **suv resurslarini tejash va atrof-muhitni muhofaza qilish** yo'nalishi doirasida:

a) **2023-yil 1-noyabrdan boshlab**: ijobiy ekologik ekspertiza xulosasini olmagan obyektlarga nisbatan **moliyalashtirish, kreditlash va boshqa moliya operatsiyalarini to'xtatib turish** mexanizmi joriy etilsin;

ekologik huquqbuzarlik sodir etganlarga nisbatan zararni qoplash bilan bir qatorda, zarar yetkazilgan **tabiat obyektlarini tiklash** va uning **muayyan muddat davomida muhofaza qilinishini ta'minlash majburiyati** yuklansin;

b) **suv resurslarini** muhofaza qilish va ulardan oqilona foydalanish maqsadida **2024-yil 1-yanvardan boshlab**:

respublikaning uzoq muddatli **suv balansini prognozini** yuritish, shu jumladan, uni har yili yangilash va suv resurslarini tejash dasturlarini qabul qilish amaliyoti yo'lga qo'yilsin;

Qoraqalpog'iston Respublikasi va Xorazm viloyatining, keyinchalik esa, **bosqichma-bosqich respublikaning barcha hududlarining** qishloq xo'jaligi mahsulotlari yetishtiruvchilariga **suvi tejaydigan texnologiyalarni** joriy qilish uchun kreditlar **10 foiz** stavkada (foiz stavkalarini subsidiyalash hisobiga) ajratilishi ta'minlansin;

v) **atmosfera zararli** tashlanmalar hajimini kamaytirish maqsadida xalqaro **“karbon market”** tizimi doirasida qishloq xo'jaligi mahsulotlari yetishtiruvchilar tomonidan barpo etiladigan **yashil maydonlarni tashkil qilish xarajatlari** qis-

man jalb qilingan grant mablag'lari hisobidan kompensatsiya **qilish** amaliyoti yo'lga qo'yilsin.

Bunda, barpo etilgan **yashil maydonlar** (yaylovlarni ozuqabop ekinlar bilan, qishloq xo'jaligi yerlarini daraxtlar bilan qoplash) bo'yicha kompensatsiyalar **issiqxona gazlarini zararsizlantirish darajasiga mutanosib** ravishda ajratiladi.

12. “O'zbekiston – 2030” strategiyasining **suv resurslarini tejash va atrof-muhitni muhofaza qilish** yo'nalishi bo'yicha:

2023-yilga mo'ljallangan amaliy tadbirlar rejasini 3-ilovaga muvofiq;

2023-2024-yillarga mo'ljallangan maqsadli ko'rsatkichlar 3a-ilovaga muvofiq;

2023-yilda ishlab chiqiladigan normativ-huquqiy hujjatlar loyihalari ro'yxati 3b-ilovaga muvofiq tasdiqlansin.

13. “O'zbekiston – 2030” strategiyasining **qonun ustuvorligini ta'minlash, xalq xizmatidagi davlat boshqaruvi**ni tashkil etish yo'nalishi doirasida:

a) davlat xizmatlarini ko'rsatishda **aholiga yanada qulayliklar yaratish va ortiqcha sansalorliklarga barham berish** maqsadida:

2024-yil 1-yanvardan boshlab aholiga yo'l harakati **xavfsizligi sohasida davlat xizmatlarini** ko'rsatishda, shu jumladan, avtomototransport vositalarini **davlat ro'yxatidan o'tkazishda** avtomototransport vositasining **oldi-soldi shartnomalari** va **boshqa notarial tasdiqlangan bitimlarini** “Notarius” avtomatlashtirilgan axborot tizimidan olish amaliyoti yo'lga qo'yilsin va ariza beruvchilardan **mazkur hujjatlarini talab qilish taqiqlansin**;

2024-yil 1-martdan boshlab notarial idoraga kelmasdan, shu jumladan, **chet eldan turib mol-mulkdan foydalanish** bilan bog'liq bitimlarni (mulk huquqini boshqa shaxsga o'tkazishdan tashqari) **elektron raqamli imzodan foydalanib, videokonferensaloqqa orqali rasmiylashtirish** tartibi yo'lga qo'yilsin;

b) **2024-yil 1-yanvardan boshlab** bosqichma-bosqich barcha shahar va tumanlarda **“Mahalla budgeti”** tizimi joriy etilsin.

Bunda, tuman va shahar budjetlariga tushadigan soliq tushumlarining bir qismi mahallalarning ijtimoiy-iqtisodiy muammolarini hal qilish jamg'armalariga yo'naltirilishi belgilansin;

v) **tashabbusli budget amaliyotini** va mahallalarning **moliyaviy mustaqilligini yanada kengaytirish** maqsadida **2024-yilda** jamoatchilik fikri asosida shakllantiriladigan loyihalarni moliyalashtirish uchun Davlat budjetidan **10 trillion so'm**, shundan “Obod qishloq” va “Obod mahalla” dasturlari uchun kamida **4 trillion so'm** yo'naltirilsin;

g) **2024-yil yakuniga qadar** qonunda belgilangan asoslarda tezkor-qidiruv va tergov harakatlariga sanksiya berish masalasini alohida sudyalari – **tergov sudyalari** tomonidan ko'rib chiqish tartibi joriy etilsin;

d) tadbirkorlik sohasida javobgarlikni yanada liberallashtirish maqsadida **2024-yil 1-yanvardan boshlab**:

birinchi marta jinoyat sodir etgan shaxsni, agar u **sud maslahatxonaga kirguniga qadar** soliqlar va yig'imlar, shu jumladan, penyalari va boshqa moliyaviy sanksiyalar tarzida **davlatga yetkazilgan zararining o'rnini to'liq qoplasa, javobgarlikdan ozod qilish**;

tadbirkorlik subyektlariga nisbatan qo'zg'atilgan har bir jinoyat ishi bo'yicha tergov hamda sud jarayonida tegishli mansabdor shaxs **jinoyat ishi materiallarini ish yurituviga qabul qilgan vaqtdan boshlab** tadbir-

korni himoya qilishga **Biznes-ombudsman, Savdo-sanoat palatasi**, shuningdek, tadbirkorlik subyekti a'zo hisoblangan boshqa tashkilotni **jamoat himoyachisi sifatida jalb etishi** (xabar qilish) tartibi joriy etilsin;

e) **2024-yil 1-yanvardan boshlab** aholi punktlarida barcha yangi qurilayotgan ikki va undan ortiq polosalari avtomobil yo'llarida piyodalar o'tish yo'laklarini svetoforlar bilan to'liq jihozlash majburiy etib belgilansin.

14. “O'zbekiston – 2030” strategiyasining **qonun ustuvorligini ta'minlash, xalq xizmatidagi davlat boshqaruvi**ni tashkil etish yo'nalishi bo'yicha:

2023-yilga mo'ljallangan amaliy tadbirlar rejasini 4-ilovaga muvofiq;

2023-2024-yillarga mo'ljallangan maqsadli ko'rsatkichlar 4a-ilovaga muvofiq;

2023-yilda ishlab chiqiladigan normativ-huquqiy hujjatlar loyihalari ro'yxati 4b-ilovaga muvofiq tasdiqlansin.

15. “O'zbekiston – 2030” strategiyasining **“xavfsiz va tinchliksevar davlat” tamoyiliga asoslangan siyosatini izchil davom ettirish** yo'nalishi doirasida Investitsiyalar, sanoat va savdo vazirligi Tashqi ishlar vazirligi bilan birgalikda joriy yilning noyabr oyida Toshkent shahrida iqtisodiy hamkorlik tashkilotining uchrashuvi yuqori saviyada o'tkazilishini ta'minlasin.

16. “O'zbekiston – 2030” strategiyasining **“xavfsiz va tinchliksevar davlat” tamoyiliga asoslangan siyosatni izchil davom ettirish** yo'nalishi bo'yicha:

2023-yilga mo'ljallangan amaliy tadbirlar rejasini 5-ilovaga muvofiq;

2023-2024-yillarga mo'ljallangan maqsadli ko'rsatkichlar 5a-ilovaga muvofiq;

2023-yilda ishlab chiqiladigan normativ-huquqiy hujjatlar loyihalari ro'yxati 5b-ilovaga muvofiq tasdiqlansin.

17. Axborot va ommaviy kommunikatsiyalar agentligi (A.Xodjayev), O'zbekiston Milliy telera-dikompaniyasi (A.Xadjayev) va O'zbekiston Milliy axborot agentligi (A.Ko'chimov) ommaviy axborot vositalari bilan birgalikda **muntazam ravishda**:

“O'zbekiston – 2030” strategiyasini **2023-yilda amalga oshirish natijalarining** ommaviy axborot vositalarida, shu jumladan, Internet jahon axborot tarmog'ida va ijtimoiy tarmoqlarda keng sharhlab borilishini hamda uning mazmun-mohiyati jamoatchilikka tushuntirilishini;

“O'zbekiston – 2030” strategiyasi **doirasida** amalga oshirilayotgan **barcha tadbirlarning ijrosi va natijalari** to'g'risidagi xolis va to'liq ma'lumot aholiga tezlik bilan yetkazilishini ta'minlasin.

18. Mazkur qaror ijrosini samarali tashkil qilishga mas'ul va shaxsiy javobgar etib **vazirlik va idoralar rahbarlari, Qoraqalpog'iston Respublikasi Vazirlar Kengashi Raisi, viloyatlar va Toshkent shahar hokimlari** belgilansin.

Qaror ijrosini muntazam ravishda muhokama qilib borish, ijro uchun mas'ul tashkilotlar faoliyatini muvofiqlashtirish va nazorat qilish **“O'zbekiston – 2030” strategiyasini amalga oshirish bo'yicha Respublika komissiyasi** zimmasiga yuklansin.

O'zbekiston Respublikasi Prezidenti **SH.MIRZIYOYEV**

Toshkent shahri,
2023-yil 11-sentabr

Internet tarmoqlarida avtomobillarga gaz to'ldirish shoxobchalarida narxlar cheklana-yotgani haqida xabarlar tarqalmoqda. Bunga Vazirlar Mahkamasining “Yoqilg'i-energetika sohasida bozor mexanizmlarini joriy etishning qo'shimcha chora-tadbirlari to'g'risida”gi qarori loyihasi muhokamasi sabab bo'ldi. Unga ko'ra, avtomobillarga gaz to'ldirish kompressor shoxobchalarida gazni sotishda uning eng baland chakana narxi kelgusi olti oyda 1 kub/metr uchun 3250 so'mdan oshib ketmasligi bo'yicha qat'iy choralar ko'rilishi rejalashtirilmoqda.

“GAZ ZAPRAVKA”larda NARX OSHISHIGA YO'L QO'YILMAYDI



- Hozirda viloyatimiz bo'yicha 144 ta avtomobillarga siqilgan gaz to'ldirish shoxobchasi faoliyat ko'rsatib kelmoqda, - deydi elektr energiyasi, neft mahsulotlari va gazdan foydalanishni nazorat qilish inspeksiyasi Samarqand hududiy boshqarmasi bosh mutaxassisi Dilshod Saydiyev. - Samarqand

magistral gaz quvurlari boshqarmasiga 28 ta, “Hududgaz Samarqand” viloyat filialiga 105 ta, Zirabuloq gaz quvurlari boshqarmasiga qarashli tarmoqqa esa 10 ta gaz tarqatish shoxobchasi ulangan bo'lib, ayni paytda ularning barchasida onlayn elektron hisoblagich (ASKUG) o'rnatilgan. Mazkur shoxobchalarga 1

kunda o'rtacha 1 million 70 ming kub/metr tabiiy gaz yetkazib berilmoqda. Iste'molchilarga sotilayotgan narx 2800-3000 so'mni tashkil etmoqda.

Boshqarma viloyat prokuraturasi bilan birgalikda avtomobillarga gaz taqsimlash shoxobchalari mutasaddilari bilan suhbatlashilib, narxni oshirish to'g'risida

ogohlantirildi.

Tarmoqqa noqonuniy ulanish, yoqilg'i-energiya resurslarini talon-toroj qilish va noqonuniy iste'mol qilishning boshqa holatlari, shuningdek, ularni sodir etishga imkon beruvchi sabab va shart-sharoitlarni aniqlash, bartaraf etish va oldini olish bo'yicha nazorat tadbirlari

yanada kuchaytiriladi. Onlayn rejimda ma'lumot uzatmayotgan, sotishda cheklangan narxning asossiz oshirilishiga yo'l qo'ygan avtomobillarga gaz to'ldirish kompressor shoxobchalariga tabiiy gaz yetkazib berishni to'xtatish choralarini ko'riladi.

D.TO'XTAYEV.

